

澄懷書屋詩鈔

澄懷書屋詩鈔卷三

長白 穆彰阿 鶴舫

古今體詩

入直行

九華殿閣森岩巖
紫微咫尺臨燕朝
誰履星辰傍日月
深嚴華省爲魁杓
黃扉丹地有禁限
春容結佩翔且翺
王之喉舌筦化理
廣颺敷奏紛煩勞
辨色卽入日晡退
庶司百職兼羅包
中承批答外糾駁
經綸雷雨馳風飈

剖析利害習典故吐納洪纖出鈐韜刻刻補牘一援筆
速於流水繁於毛絲綸之簿浩煙海九經不似黃麻高
帝曰樞府朕所重爰簡碩彥規百僚咨爾才德庶其可
爲予左右襄鈞陶文書筐篋但餘事陳閉獻替德不佻
上端主極進吁咈下繫民脈回漓澆斷制羣言允諧弼
挽回患氣懲淫慝封事詔書審安便毋任法令爲弁髦
嘉謨閎議具入告料量斟酌剔秋毫選公登明退不肖
荃蘭蕢荼靡溷淆二氣五行入調燮九夷八蠻來歌謠

天人王霸運掌上惟汝欽哉罔嚶嚶威儀動作必方正
神明運用無固膠股肱耳目得所託君臣相說占泰交
明良嘉會汝自懋無讓專美歸夔皋九拜稽首荷寵命
惟

君仁聖踰舜堯照臨百官鑄兆姓垂拱雍容神理超臣
愚固陋受甄育豈有一得如芻蕘久忝卿貳不効去太
倉分粟慙饗饗古之納言後樞密豈宜汎濫容斗筭才
微任重赤汗下念此報稱心忉忉臣昔讀詩慕補袞今

居其職誰能教潢潦不作江河導棕櫚敢比梧桐翹金
鐘大鏞在東序土鼓瓦缶從棄拋

聖恩自是采蘋菲世人未免羞繫匏但當夙夜守兢業
不使磨涅汙躬操臣心如水門非市古義在佩良久要
萬幾宵旰治功定敬宏德意宜春膏承平萬載順
帝則勲名永久長荷叨

贈曹儷笙相國四十韻

盛代公孤佐中天柱石臣雲霄隆

眷顧河嶽富精神八極歌良弼

三朝輔

聖人錦箋聯鮑照華省重王筠
緬昔經傳舊於今世澤新
英芬輝日月藻譽映鰲辰
祕簡奇揆酉魏科歲紀辛
文章鸞掖貴弓冶鯉庭親
玉署能繩武冰銜穩稱身
十行恩綍賁幾度使軒巡
化雨絲絲意和風盎盎春
奎垣恒秉軸珊瑚網鮮遺珍
共仰名儒範洵扶大雅輪

文謨恭珥筆

堯典頌傳薪燕許才難企韋平績絕倫貳卿旋晉秩六
府更垂紳肅若綱維舉釐然矩矱遵金甌先協卜玉鼎
早除真朝野尊台宿卿僚式後塵

彤庭資獻納黃閣報忠純雀弁昭殊寵龍畱卜累仁德
門欣御李望族共推荀桂毓雙枝秀蘭舒五色勻琳琅
窺祕府舟楫贊洪鈞密勿韜鈴啟訐謨

黼座陳邇惟籌遠略用以靖邊民露奏馳千驛霆威格
七旬軍容盛貔虎圖畫上麒麟懋賞先疏廣酬庸首寇

恂丹書銜彩鳳紫勒引花驄變理三台正調和四序均
公仍卑自牧善與德爲鄰說土原甘肉論交若飲醇詞
林慚後輩水部託同寅樗櫟終何似芻蕘每下詢卽今
偕瀑直尤幸荷陶甄退食陰移午趨朝夜向晨清談常
娓娓雅誨亦諄諄謹慎推諸葛嚴明媿有莘平生傾仰
意鏤管罄難伸

扈

駕盛京

卷三
周制隆邠岐漢典篤豐沛

聖基耿光烈陪京建都會

皇情眷故國巡幸飭旌旆千里峙亭堠萬乘奉輪蓋雲
罕樹延絲雷車震硤磻黃屋炳華葩朱旄散明靄清剛
一以度平楚杳如繪汎然薰風來時和調百籟列屏嵌
遙岑擗管咽清瀨椅桐暖蔥菁禾穗穎佼婉俗淳美風
物豫游乃光大豈曰發祥迹規制固無外法宮肅起居
原廟祗禋禴禮闕慶不屯濃濃澤滂霈臣愚濫左右內

疾受恩最言軫本業艱翬翬贊清泰

出山海關觀昔人所築長城並覽松山杏山小凌

河大凌河諸勝慨然述事

天風莽飄飄吹我出雄關日照滄海白雲與長城連長
城何迤靡萬里揚無邊秦人不曉事調發紛可憐當時
苦經營民力訖已殫天下屬誰家俛仰生悲歎在德不
在險此語吾所尊我

朝始東土

列聖恢乾坤深仁與厚澤蟠際何輪囷泰宇調中和荒服見本根回念開國初艱難那可論指揮樹黃蓋出沒松杏間壯哉六十戰盪決無當前

天戈如雷霆螳螂歛摧殘至今覆軍血河水流潺湲晨涉凌河險暮思攢無端覽今吟勝慨念曩標殊勲乃知開剏才文武兼聖神臣雖謫劣姿于役心所欣濡翰述盛德浩蕩垂千春

登醫巫閭山

輪蹄若不息忽忽開雙眸萬仞青芙蓉高插天半周祖
龍始驅之欲去乃復畱黛色滿關東窈窕如可求日麗
羣峯見風吟萬松幽中有桃花洞仙客時來游惜哉塵
土蹤逍遙曠無由會當一登臨睥睨小九州

登瀋陽城樓遠眺

幽沛重開基瀋陽尤所仰振衣上層巔城郭詆蕩蕩峻
閣峙雲平崇墉屹霞上山從向背奇水自東西廣雨漬
燕支勻晴搖鴨綠爽仰扳入虛空俯視極遐敞中原但

一氣誰能辨垓壤拓茲千里目聊用出塵鞅

長白山行

屹屹乎長白之山矗崔嵬穹窿莽曩乃踞北海隈高不知其幾千萬萬仞第見飛騰直上千霄蔽日去不回下有鴨綠之江浩奔注蕩蕩萬里流醲醑有若十洲弱水隔仙境崢嶸嶸岨高蓬萊其上去天不盈咫尺未許擔簦躡屩來凡儕青雲白雲繚而曲巖扃岫徑紆滌洄金支翠旄隱復見神官仙子相徘徊茅君乘羽車桂父蹋芒

鞋玉妃金母悅來下瓊佩綵繚旂旛排鳳凰翔其巔麒
麟肅孔皆鴟鴞不敢集奔走虎與豺或或芝蘭條戢戢
松柏材斧斤不入野燒絕蓬蒿荆棘自爲摧投虹貫蜺
吐風欲雷休氛四塞蔥蔥佳哉造化神明不可摹猜其
氣蜿蜒縣亘難以道里計南行曲折乃到青齊之野渤
海厓迴龍一顧忽翕聚結爲東岱元氣名徂徠嗟爾東
岱乃是中國五嶽長豈知遙支遠脈從茲來下視恆嵩
衡華已培塿何況終南太行天台羅浮各各跼蹐齷齪

如沙堆榮光淑氣鬱結以磅礴蒸爲醇風美俗熙春臺
留都發祥此繇託恢恢大業如豐邵

聖人一出清四海乾坤整頓銷塵霾垂裳淵默念肇跡
詔遣大官陳尊疊使者恪共肅明祀奉承香帛虔潔齋
手捧鸞章粲十色牲牢前列隨符牌千峯萬壑呀然豁
煙清霧埽天無埃黃琮旣薦清酒進屬天白氣明皚皚
三呼萬歲若響報聞者動色震其懷始知降神毓秀有
本末上與乾坤闔闢通化裁吾聞梁父七十有二代大

抵禮儀符瑞徒堪哈願得金泥玉檢藏此山傳之千齡
萬代昭示國家受命帝基所由開噫吁噉休哉國家之
德暢八埏兮泝九垓黎烝覺悟大道偕昆蟲凱澤樂兼
該協氣旁流應泰階下無李斯馬卿之臣獻斌媚敢請
封禪崇謫詆上無蜚聲騰實之侈心懼蹈秦皇漢武故
轍生禍媒國家尙質不尙文焉用紀功立石夸耀髻與
鮐此山此山千齡萬代一根本惟與
聖德敦龐純固其無涯

瀋陽雜題十首

呂翁山

大帥成擒處

茲山乃聖祖擒洪承疇處

峯巒截衆中艱難見

王業濠塹尙西東

巨流河

古源自西北浩瀚瀉長河萬里積寒色孤煙落日多

金剛峯

一鶴下金剛回首多惆悵高高不可攀白雲獨來往

松花江

放舟松花江江水深千尺舉網得嘉魚那羨江南鯽

具瞻亭

孤亭縱心目山海畫圖間何處採大藥安期訂往還

瓔珞觀

精廬倚九霄縹緲天可揖借問挂瓢人不知風雨集

十三山

天外簇芙蓉行行策短筇閭山看未了又送十三峯

祖越寺

山峙水潺湲
陂陀百折間
空王如可學
來往非人寰

羅漢洞

拄杖看崖厰
凌空鑿戶牖
怪禽不敢啼
中有尊者某

鴛鴦湖

湖水汎鴛鴦
參差葳苒長
夕陽明滅處
萬頃白茫茫

由瀋陽還京二首

其一

聯鑣返長路
望望見青門
秋色暮相合
離情歸益繁
馳

驅敢言苦侍從久承

恩一自經行役方知大業尊

其二

鐘鼓嚴鼇禁衣冠肅鷺行

六龍迴日馭五鳳啟天闔槐棘瞻溫室枌榆憶沛鄉夜
深東北望佳氣鬱蒼蒼

扈

駕

東陵

大禮殷配天精誠貴格祖寢廟旣奕奕原陵亦膺膺霜
露愴時歲車駕飭班部翠華停隴阜緹幟幕步武穆然
大雲起佳氣偉龍虎瘞主升素帛酌瓚奠清醑仁思愴
震蕩神靈默昭昨一人恪行踐千官愉蹈舞對越嚴跬
咫尺應感周區宇純孝孚神明嘉貺篤貞祐侍從奉鑾輿
磬折曳圭組睟度徒仰窺緼儀媿靡補

扈

駕

西陵

二陵鬱相望佳氣藹森森園塋重歲省鑾輅勤時臨陂
池澹流水封道芬嘉林陽宮峙巔岑陰隧闕幽深衣冠
月出游肸鬩聆威音靈爽鑒赫赫對越式悃悃愾哀
慕遠陟降神明歆繩繩

列祖德軒昊勞企欽陶鈞補世闕禮樂銷天祲重光奠
國步大順饜人心金縢炳典紀紘極流謳吟謨訓在官

府願持獻當今

扈

駕南苑

聖主懲晏安承平重戰備
圍獵乃蒐狩苑囿匪娛戲
緬彼岐陽規馳射講戎事

天威按太阿古黃振靈轡
脩亘彌百里侍從沓萬騎
雲麾翩龍矯雷礮接鱗次
勢合迅風雨聲舉動天地
禽驚反自投獸瞠不知避
血毛一灑擊蹂躪踴快恣
士怒識

材勇馬騰知質異行賞剖金繒叶樂間歌吹肅殺順天
序豈傷喙與跂微臣奉屬車仰覩神武志請陳甫草詩
陋彼甘泉義

掌院行

木天穹窿五雲繞中有玉堂清且好東壁圖書護幽宵
老槐拏攫風縹緲鬼裁俊乂咸國寶有若列真在瀛島
熒熒蓮火照制草摩空作賦腹成橐雄文馥郁絢紺縹
瑋材炳麗刻金瑤國家寵遇信非小大爲鸞鳳次騷裏

學術才藝以時考激厲裁抑責師表嗟予從政學已槁
來爲館長心則燥凡百學士乃案僚相與礪琢窮探討
自知立學苦迂拗勤勤儻得偕大道儒者進修慎雪澡
霍如初日長杲杲刮垢磨光偉瑩皎汪汪之度深以顯
無爲慄薄豔虛躋語言文字雜儂佻平褰荆棘作采藻
朱鉛塗飾靚娥媼紛綸卉犬映璣玅魏收蛺蝶逐良鳥
俳人娛戲工匠巧不然刻意慕誣矯非聖之書甘齟齬
字句聲牙意纖眇蛇神牛鬼鬪妖嬈雲譎波詭幻難了

越禮驚衆無端兆欺世駭俗矜獨造德貴厚重才貴老
豈可破瑣爲煩擾光儀蘊藉比圭璫文章樸素勝純縞
千秋血脈斯遠紹周情孔思汝其曉一拂塵璫翦蓬葆
聲華馳驚芟如埽嚴氣正性貫秋昊勿云潛學知者少
是非同異靡傾撓任重致遠吁可保錫命大廷印綬繚
蔚爲夔契襄軒皞自慚簪纓致身早知聞稍稍積分秒
濃荷春膏畏輕掉古意今情憂思悄側望羣賢來浩浩
長林杞梓弗枯夭荃蘭蘅茝擢汙潦琥璜未許等琬璫

升之明堂作賓侶雍雍交贊無嫉媚令我滿志開懷抱

壬辰典試春闈和朱詠齋前輩元韻

鑒別須防穀似稊敬思名實繹

天題五千士競雲章獻九萬程爭月路躋識曲定從絃

外賞看花翻恐霧中迷門牆桃李孫枝發

予於癸未曾主禮闈今科

分校者王編修篤黃侍御爵滋池編修生春許主
政球周編修開麒卞侍御士雲凡六人皆門下士十載

重來更滿蹊

于役南河

一騎發幽州
恩恩河上遊
乾坤需砥柱
版築本防秋
豈料荏苒盜
偷橫竹箭流
此來須蕩滌
使者稟宸謀

與張芥航河帥敘事抒懷

與子不相見
鬚眉各老蒼
百年從萬事
一醉到千觴
楊柳絲絲雨
芙蓉浦浦香
天涯成宴會
倚劍興何長

發清江浦往鄂渚

江淮非我家
江漢爲我情
王事有區處
客子重行行
吳

頭與楚尾扁舟意縱橫娟娟鷗鷺白擢擢菰蘆青菰蘆
自有花鷗鷺自有盟嗟我世上緣浩蕩隨蓬征十搖更
九兀言登鄂王城城中賢主人握手敘平生進我以肴
蔬拭我簪與纓雙鬢颯老蒼半作霜雪莖誰似松與喬
悠悠千百齡且持一樽酒非醉還非醒

舟中望鸚鵡洲弔禰衡墓

泰岱不厭高河海不厭深周公勤吐握白屋變華簪繼
以孔北海意氣千瓊琳上表薦一鶚一鶚凌嶇嶽未見

雲霄騫但愁增繳侵哀哉鸚鵡洲芳草鬱爲林草長骨
自枯洲古淚俱沈曹瞞匪人情伎害慘不禁至今西陵
田松檟巢惡禽奸雄事已矣樵牧誰見尋不如禰衡墓
其上青森森居者守其封行者涕淚含有酒試一酌有
荔與黃柑呼僮代之祭惻款職所欽勞生事風義古道
存影袞往憾亮莫補寄此憐才心九原知不知雨溼天
陰陰

武昌雜題十詠

西塞山

流水鱖魚肥山前白鷺飛扁舟當落日疑是志和歸

南岡

南岡有雙柏鬱鬱多黃昏悲哉處仲驕恩怨不堪論

蘆洲

江濶菰蘆白人奇涕淚紅不逢漁父好奔走太恩恩

瓜圻

昔種吳王瓜今殘鄂渚秋盛衰如轉轂莫笑東陵侯

樊口

扁舟下樊口日落酒帘低若訪潘邠老東坡醉似泥

僊棗亭

棗下何纂纂笛聲起裴裒亭中寂無人只是呂仙來

黃鶴樓

黃鶴去千載白雲恂悅之神仙不可遇何事苦題詩

飛雲洞

古時一片雲飛飛自來去借問讀書亭縹緲在何處

赤壁山

棋局孫吳盡東坡載酒游至今風月好不憾大江流

怡亭

怡亭不可訪望望只斜陽中有古三絕聲名墮渺茫

武昌畱別

驪歌一唱不勝情江漢春來歲序更久住漸忘身是客
催歸應倩鳥呼名短亭斜日長亭雨五里東風十里晴
北望薊門煙靄合花朝時節近清明

畱別訥近堂制府二首

其一

征帆一路水雲鄉
小住袁江又武昌
盼得芝蘭欣把袂
爭禁風雨促歸裝
望中

北闕生朝靄別後
南樓倚夕陽
鸚鵡洲前莫回首
離情應比水流長

其二

煩君事事費經營
使我安居忘遠行
感極當前翻語澀
喜因狂處轉心驚
桃花古渡歸仙棹
楊柳東風送客程

又聽楚人歌楚治

百文敏公節制兩湖士民有三月楚治扁額懸黃鶴樓上覽之爲君起舞

故交傾耳在春明

曉行

昨夜東風楊柳斜
曉行紅塢有人家
若非彭澤三三徑
定是桃源片片霞

發武昌之大梁

舟喜雲水活
陸厭風沙多
久在道塗間
天性爲研摩
言辭鄂王城
去訪嵩山阿
黃河崑崙來
魑魅窺人過
忠信

涉波濤往往無蹉跎暮抵大梁驛梁館停我車念昔枚
馬羣侍從誇吟哦賦手摘風雲辨口嗤嶮嵯迢遙不可
接千載徒媿嬰侯嬴實壯士賈誼近儒科斯人骨已枯
流風今則那無乃自伏匿不得同酣歌深淵出明珠良
田產善禾宛轉羈旅中古心非有佗不見崆峒巔倚劍
憶番番風景豈所耽成物當如何

汴城小憩訪艮嶽故址

中州在天地元氣何彌漫嵩山高不極黃河蓄其源我

行一披寫緩步聊躋攀城郭俯萬家浩浩風雲間惜哉
宋人愚工作民力殫至今東北隅艮嶽煙荒寒甍甍鹿
在林唼唼鴨啼欄門敲景龍斜宮弔華陽殘銜日與排
霞皆當時石名奇石今已刊古木無人蹤蜩螳鳴且酸衰盛
若朝暮樹德者爲賢朗誦無逸篇典型誠肅然

發大梁之濟南

汴城與歷城邇迤數百里白雲爲我導行行且復止歷
城佳山水寰宇竟誰似仰攀華不注俯拾趵突水窈窕

函山島中有王母使澹澹濯纓湖滄浪移在此人生苦
束縛名利相倍徙願言結一廬瀟灑其有以嶽色爲我
青海波爲我紫放觀天地間炯炯識終始惜哉迫馳驅
齊州只逆旅小憩非久畱感歎成坐起

謁東嶽廟因述七十二君顛末

天行帝出震劃然開東封垂旒翼雲表日月昌以丰金
輿若山立蒼麟搖青鬣飛樓帶闕殿雲氣棲其中檜柏
何櫛櫟巖壑橫復縱周以三千里廓乎其有容勢橫恆

碣盡支壓齊魯窮泉石競沮洳煙嵐互龍從厥初造化
手劈此何其雄人寰乍隱見雷雨開鴻濛後來競娥媚
藉以夸世功七十有二家譎怪欺瞽懵亭亭與繹繹考
古難爲宗惜哉秦皇愚繼以漢武庸荒唐信緯書刻石
摩蒼穹至今苔蘚綠壇壞碑倒衝金甬玉檢處魑魅來
呼風煌煌詩書文崇實乃懲空封禪不經見此理吾所
崇陋矣管莊說橫鶩徒洶洶遂令周衰後上下聳其聰
虔心祈不死不死會有終海上求神仙神仙意固慵瑣

屑書史策缺陷難彌縫小人笑其敗君子心忡忡
聖皇備智勇千載曠一逢臣職忝侍從論道慶時雍符
瑞一以芟但銘鼎與鐘三揖靈峙前莊語非私衷

登岱口占

其一

皇華九度未登臨

余于役江南往來九過泰安

此日攀躋愜素心曲

磴千層凌絕頂長天一覽豁塵襟山花雨過猶含潤古

洞雲封不可尋更喜風流賢令尹

徐樹人明府

載攜斗酒話

宵深

其二

選勝欣看鷺序聯

汪竺君史椒
圖兩比部

雲梯同躡翠微巔飛泉

遠挂重岩瀑大野晴開萬樹煙卽景人皆歌白雪憑高
我欲問青天漢唐封禪今何在靈嶽巍然不計年

周小湖學使評梅圖

其一

管領春風第一枝圖成香雪最清奇空山明月無今古
占斷風情祇自知

其二

幾生修到此花清玉骨冰肌取次評料得梅花應解語
他年事業在調羹

讀周小湖提學集唐詩卷

點綴全唐什高吟簇錦圍匯流成海水無縫著天衣大
小千珠合縱橫一筆揮君才非斗計燕許早揚輝

別施樸齋明府

皇華有客賦長征旅館春風對酒觥才得知心通款曲
忍將握手訴離情夕陽古道雲千里芳草天涯路幾程

莫怨相逢遽相別
頌聲容易到春明

還京晤曹儷笙相國

一發江南櫂徜徉
齊楚間此行幾千里
相見各蒼顏潞
國公長健張騫我乍還
新情兼舊事款款語回環

男薩麟校字

澄懷書屋詩鈔卷四

長白 穆彰阿 鶴舫

古今體詩

題陳芝楣棠芝圖

舊識探花兆甘棠苗瑞芝文章能繼美草木有先知今
已成時棟天教整羽儀勤勤樹佳政葵藿報

彤墀

和英煦齋師贈詩三疊韻

其一

杖履新朝

闕經綸早擅場
淚飛沙外雨心老
鬢邊霜覆載情何限
升沈事莫傷
卽看黃閣老霖雨九州償

其二

風雲一回首
師弟起詞場
紫塞三年別
青天十指霜
詩

心韜幹濟禪榻

時師借
寺養病

鎮悲傷
卻願趨庭者

濃恩二妙償

其三

老作松樟幹出差桃李場詩歌清不滓肝膽白於霜古
寺無人到浮雲有淚傷看公用幽意鐘鼎未能償

透光鏡歌

春蟾夜湧層雲端流珠散彩黃金盤掩書罷酒不成寐
碧窗重展玻璃看剝啄來故人揖我示我希世珍錦囊
貝匣未及啟冷氣入座天無春團欒寶鑑徑一尺海獸
雲螭繞鏡脊幾字銘詞未可詳古篆空畱漢時碧有時
映月波澄面鏡背文從鏡中見豈是琉璃鍊作胎一片

通明逞奇變我聞黃帝作鏡十有五
四靈八卦相環舞又聞秦人治鏡
十有三七神五嶽紛趨趨漢唐法古鑄
奇器銳形浮水誇珍異大美應先出
上方以次頒之百執事迄今舊物亦
無多書生博古空搜羅戈頭鋌足賸
殘廢且令一日三摩挲偉哉好古如
君少藏得元圭三代寶神物偏能覓
主人俛仰三生就懷抱

聖朝玉鏡開仁壽古鑒西清無不有
此鏡惟君能世守百歲千秋弗瑕垢
指點月華共長久

題畫

重山疊疊水周遮
屈曲疎籬入望賒
千片桃花數枝柳
春光都在野人家

讀史

漢代重經術天下良吏多
民淳安樸陋政簡無煩苛
朝廷考殿最守令爭濯磨
豈無嚴酷者未足干祥和
飛蝗不入境猛虎遠渡河
我讀循吏傳慷慨興悲歌

易州工次答奎玉庭總戎見贈

其一

一朵郇雲降長城五字詩懷人殷舊雨論世等圍棋金
石交原久醇醪飲後知將軍不好武風雅是襟期

其二

往歲初旋節聞君正建牙偶來通款曲

去年予到工甫
一日卽奉

召回

終竟負韶華共此尋芳約重知逸興賒東風莫相

怨珍重滿園花

謝玉庭送瓶花

一枝穠豔一軍持點綴韶光處處宜雅意能令幽賞足

名花恰是半開時小窗風雨憐孤館觸目芳菲動客思
我亦滿園春色好爭教桃李怨歸遲

題奎玉庭總戎紫荆關閱兵紀事詩卷

聖皇禮樂彌寰宇安不忘危習桴鼓突兀雄關半地天
太平儒將兼文武欽承

恩命鎮西隅手握牙璋膽氣麤元凱經綸推左癖畱侯
韜略擅陰符簡卒陳車氣慨慷蕭蕭落木塞雲黃十丈
旌旗截飛鳥一軍號令肅秋霜元戎顧盼雄無比天外

峯巒時伏起爲有胸中百萬兵不負山行七十里山行
初度小龍華簇簇秋花撲隊斜馬足縱橫馳萬騎羊腸
屈曲繞三叉峯斜路轉藤蘿墮三步回頭五步坐爲報
猿猱莫駭奔自攝貔貅咸帖妥行行忽見紫荊關關在
崎嶇窈窕間天險至今爲拱衛山形終古自回環翠柏
亭亭石齒齒軍容閃爍秋容紫蘆花嶺上一舉雲拒馬
河邊堪飲水望塵羅拜盡呼歡甲仗分排畫戟攢列部
偏裨爭負弩連營刁斗各傳餐點軍按閱無紛雜臨淮

壁壘孫吳法技奏雙環紫玉刀力穿七札黃金甲操防
甫畢論行賞坐對青山鬱遐想古來形勝互爭持此間
征戰何紛攘五原關外戰場多漢破烏桓馬伏波典午
更聞驅石勒南朝幾度困金坡櫓槍厯厯嗟明代北狩
英宗吁可怪七貂奸豎持議謀匹馬君王遭辱敗折鐵
沈沙年復年居人鋤拾舊戈鋌可憐白骨都成土無限
黃金爲禦邊方今

天子調寒燠倒馬居庸非舊俗父老不知烽火紅村墟

但見桑麻綠擊轂摩肩野市情黃童白叟踏歌行北來
賈盡南來賈關內耕從關外耕邊塵洗盡謳歌衆萬國
梯航來作貢終日操兵不用兵與君同上昇平頌

潘芝軒師金帶圍圖歌

東皇弭節畱餘春婪尾數枝紅向人天開異草獻嘉瑞
仙萸朱草相鮮新琉璃葉亞瓔珞重珊瑚朵暈臙脂勻
雙跗並蒂爛宮錦燦若一縷罽黃銀廣陵盛事豔天水
四相猶憶韓王陳孕靈毓異有奇驗造物雕績非無因

是時黃麻宣

紫宸我公特進調鴻鈞灌花主人颺然笑西鄰受福占
東鄰圖成拜獻述顛末花枝綽約傳精神幾生修得到
此花俯視衆芳無與倫今從祕省銜絲綸紫泥罷草鉤
簾頻元暉白傅皆詞臣從容委佩垂長紳和羹恰與鹽
梅親噫吁嚱佳哉和羹恰與鹽梅親

甲午典試順天和壁間王衷白先生韻

昌時禮樂百年深三輔

恩波久照臨雨露化醲涵教澤風雲氣壯藹文林琳圭
球璧光俱古賁鼓鐘鏞響不沈東岱爲霖吾祝汝莫辜
耿耿愛才心

輓曹儼笙相國二首

其一

元勲柱石鎮山河晝隕長星可柰何側席九重先隕涕
輟春四海不聞歌技歸彥聖才能斂功奏升平燮理多
一老愁遺斯已矣朝端誰更髮皤皤

廊廟回翔六十年豐功茂業要雕鐫起居長使蠻夷問

姓字偏教婦孺傳本以高官酬碩德翻從上壽惜華顛
九原莫再憂天下竊爲明公任仔肩

乙未典試禮闈疊前韻

軼蕩天衢九達深萬邦文物盡來臨騏驎要放歸燕市
松柏應須采鄧林豈有荆山悲玉刖不教滄海歎珠沈
文衡疊秉慙難稱勉體

天家育士心

湯海秋侍御以言事改官走筆慰勉之

抗疏向王廷古心常自銘蹉跎因諫諍雨露寓雷霆天
意工陶鑄才華就典型一枝猶可借郎署養伶俜

和英煦齋師見贈元韻

其一

慚愧絲綸地驚聞

寵命頒心仍澄似水

恩更重於山矢報殫臣力承歡慰母顏程門三十載師
訓未曾慳

其二

語並春風暖新詩一札頒優游開綠野景仰得高山衣
鉢欣傳范簞瓢愧鑄顏錦箋珍篋筭翰墨發天慳

入閣行

今之黃閣古三公從容坐論宣皇風但暢道德無吏事
周旋揖讓調泰鴻絲綸組織文章靜典謨訓誥光熊熊
鹽梅旣和餽無覆陰陽以遂時則豐輔弼三台應執政
太微之曜麗紫宮國家柱石必審慎正人斯吉儉斯凶
繫予入官三十載微才薄學如秋苴承明金馬事文筆

委蛇久住蓬萊峯歷登臺寺陟卿長簿書盈篋愁空侗
法令旣明載清淨謨猷具告惟靖共忝從樞府領機密
上奮帝載熙天工百揆四岳職兼并科條案牘堆叢叢
紛糾雜遘不暇給秋日落葉風吹髮匪躬謇謇佐密勿
長恐識短才爲窮今茲

詔作百僚長台衡鼎鉉

恩澤醲震掉戰慄失所據念此非分徒忡忡古來丞相
作邦本任重責厚難爲功姒姬以降幾千載賢輔落落

艱繼蹤蕭曹丙魏壯漢室房杜姚宋匡唐宗有宋韓范
暨司馬燄燄勲業咸崇隆其餘進退無大節卑陬瑣細
何凡庸吾儕屬意在千古具臣齷齪羞難同竹帛旂常
古所有豈可自視如蒿蓬

今皇仁聖絜天紀萬幾就理執厥中屢植梗楠動寥廓
迺授樛櫟加斲礪臣本顓愚性頗摯報國何以完精忠
歌賡稽拜頌丕烈勉效塵露酬

九重元化滂沱莽四塞山谿海甸春雍雍明堂大開集

琛賁太學旁啟鏗鐘鏞九州成熟委菽粟四夷貼安銷
兵戎疫癘不作水滂絕風雨有節寒燠從惠加禽獸無
猶狘恩及草木多繁茂昇平

聖神總成象贊襄惓惓摠寅衷德慶萬年量百世茫茫
此志將安終

奉

命管理工部恭紀

帝曰共工汝往欽九霄

詔命拜

恩深久依夏屋霑

殊渥又總冬曹對盍簪六職聲名慙拆襪千秋事業想

爲霖新安閣老精勤甚

曹儼笙相國久領斯職克勤克愼

趨步前賢此

赤心

奉

命署理直隸總督篆務恭紀

天語從容下紫霄三關重地領旌旄山蟠黍谷分青靄

水東滹沱息怒濤今日誰當勒鐘鼎中樞吾已媿夔皋
此行春滿高陽道

闐闐雲來首重搔

登高陽城

攀陟情何限城高近

帝鄉西山青突兀東海白微茫三輔崢嶸地五雲縹緲

旁葵心時戀

闕顛倒著衣裳

由保陽還京

炯炯銜

恩命行行指

帝閭炎蒸忘九夏清切近

三光籌曉頒

天綍鑪煙捧

御香臣心餘惓款長侍

聖人旁

戊戌典試禮闈再疊前韻

主持文柄

國恩深鑱院掄才五度臨經義豈堪爲士則科名空自
長儒林素毫點處春風冷紅燭燒餘夜漏沈爲語綠袍
三百輩可知慘澹歲年心

題英煦齋師承暉園紀

恩詩卷

其一

相門爭看老萊衣

天語親承出紫微
總爲蒼生酬世德
還將綠野寄恩暉
好花依舊迎鸞臈
高柳從新識燕歸
彈指風煙蔥鬱處
十年林木翠如幃

其二

當年開閣引書生
醉白池邊水石清
傳鉢祇今慚魏國
肯堂畢竟有元成
心扶日月依霄漢
膝繞風雲接玉京
最是趨庭多樂事
一門春永九垓平

顏魯公銅印歌爲顏魯輿中丞作

有唐社稷成邱墟天荒地老鴿鵒呼魯公義氣不可滅
銅印斑駁如盤盂龍門之英丹陽節千鍾百鍊騰華腴
渾疑神物圖魍魎那數漲海青珊瑚字擬周籀雜秦篆
懸鉞倒籀姿媚殊不知何手擅雕刻煙霏霧結迴鸞如
咄嗟魯公遭屯蹇河朔盡陷豺狼驅棄郡間關赴行在
忠言讜論規唐虞始忤元載坐誹謗終排盧杞成齟齬
汝州煙燄方塞天議遣國老何爲乎積薪可赴坎可陷
口銜君命思捐軀當時作書誠諸子敕奉家廟憐其孤

其他玩好不關念嗟爾銅印尤區區滄桑變幻時代易
金人石馬今有無雨淋日炙野火燎沙崩泥壓土花鋪
此印獨爲鬼物守河聲嶽色精靈俱賈人未辨蟠蚪蚪
文孫再拜珍璫璵賢哉文孫弗可及洗剔故物心踟躕
屈玉生金劃恍惚偃波垂露芟模糊有唐距今千餘年
捧物思孝勤菑畲師古常山是一脈司徒忠烈騰門閭
長懸此印念祖德努力報政酬旌旗行銘晉鐘更衛鼎
君子之澤誠有餘吁嗟乎君子之澤誠有餘

男薩徵校字

自韓愈氏有言歡愉之詞難工窮苦之音易好歐陽公效之亦稱詩必窮而後工後之論者大率祖述其說以謂宮音和溫難於聳聽商聲悽厲易以感人故凡身際盛朝而位都卿相例不與衰世窮巷憔悴之士角文藝之短長人人相與持是說而不變所從來久已芝昌嘗究觀詩教之終始竊獨以爲未必然也鄭氏所撰三百篇譜大氏成周盛時賢人有位之作爲多西漢蘇李東漢班張號爲能詩亦當兩京全盛之日李唐之世詞人

百輩累迹而興然世所稱爲四唐者雖愚者亦知右初
盛而貶中晚蓋聲音之道與政相通國家鼎隆之日太
和充塞庶物恬愉故文人之氣盈而聲亦上騰反是則
其氣歉而聲亦從而下殺達者之氣盈矣而志能斂而
之內則其聲可以薄無際而感鬼神窮者之氣旣歉而
志不克劃然而自申則甕牖窮老而不得一篇之工亦
常有之然則謂盛世卿相之詩轉不敵衰季窮巷之士
者殆未爲篤論也吾師長白宮保相國光輔

聖主將三十年智深而量遠果決而閒定暇日以所鈔
存詩四卷見示芝昌受而讀之簡肅清和不名一能述
懷紀遇諸巨製具見立身之大而行役之作扈從之章
生平政蹟略備於斯抑有詩史之遺意其於六朝唐宋
諸家若合衆金以融一冶而鑄爲重器觀者但知器之
良而忘其金之百鍊而致精也於時

皇清承平已二百餘祀重熙累洽遐邇禔安跂行喙息
之倫莫不如仁踐義時會可謂極隆而吾師入總百揆

出領三輔門生故吏吐哺延接

天憲出內曹司白事手批口答日以百計而乃從容揮
斥時從事於吟詠若行所無事者才分之優絀什百千
萬如此其遠也觀吾師所際之時與夫詩之所詣而後
知曩之宗韓歐之說者亦所謂察其一未覩其二者哉
讀旣竟因附陳微義識於簡末用質知言者焉道光二
十七年九月日門人季芝昌謹跋

竊以星輝雲縵八伯起而和歌玉振金聲衆音集而成
響溯皋夔於虞代競效賡颺緬旦奭於周京聿開風雅
惟我

宮太保相國夫子神由嶽降知本天生自列詞垣漸登
臺閣出操節鉞入掌絲綸作史兼才學識之長居官懍
清慎勤之素首輔績懋

心簡恩隆似無暇摘句尋章以宣示名篇鉅製雖詩本
情性原爲子所雅言而藁未流傳尙非世所共覩福培

受知宗匠廿有六年歷上春官十餘二試每逢進見必
以敦品勵學相期實未知夫子之詩有全集也今夏六
月趨謁淀園夫子始以澄懷書屋詩鈔若干卷命以校
閱敬受而讀之第覺光風霽月之懷旋乾轉坤之手忠
主愛民之意求賢爲國之忱無不於詩乎發之至於游
覽山川驅使草木居今思古卽景言情無非鉅觀猶爲
餘事夫子遭逢明盛悉占風虎雲龍福培知識疏庸莫
辨魯魚亥豕尋繹再四見卷首尙無一序謹思綴以數

言自愧無文非惟不能亦不敢誠以論詩知學論學知
詩必得可與言詩者始可作序也及至冬月晉謁第中
夫子手一卷以示之且謂感遇諸詩不當分以甲乙尤
仰撝謙之度實遠出乎尋常金百鍊而彌精圭三復而
無玷盥手莊誦有壬辰三鼎甲之文在焉綜四卷之精
華得三公之揚摧集成一品光耀千秋洵堪擅美於前
流芳於後從此登庸衣鉢並可相傳豈徒吟詠篇章同
欣倡和顏謝之孤芳不爭房杜之取名猶細能言詩中

之遠志者則朱少農之所敘也表章燕許之宏裁獨闢韓歐之舊說最得詩中之大體者則季少宰之所跋也抉作者之心快閱者之目條分縷析備徵典麗喬皇挈領提綱逾見宏深肅括詳述詩中之精義毫髮無遺者則吳少宗之所譔也厯數高才之倚馬揭美善於毫端何煩淺學之續貂贅言辭於簡末况黃鐘並奏宜瓦缶之無聲迺大匠兼收竟非材之不棄方春和之時羣生皆有以自樂逮秋爽以後微蟲亦假之使鳴雅音作而

鳳鸞喜見來翔大廈成而燕雀許隨相賀諸公已躋堂
奧共欣賞夫鴻文小子忝列門牆長願附乎驥尾

道光二十七年十一月望日受業門人李福培謹識